

Bogumil Hrabak (1927-2010)



Bogumil Hrabak je rođen 11. januara 1927. godine u Zrenjaninu. Niže školovanje završio je u Zrenjaninu i Senti, a studij historije na Filozofskom fakultetu u Beogradu (1946-1951). Doktorirao je na Filozofskom fakultetu u Sarajevu 1957. godine sa doktorskom tezom pod naslovom *Dubrovački izvoz žitarica iz Otomanskog carstva do početka 17. veka*. To je bila prva disertacija iz oblasti historije koja je odbranjena na Filozofskom fakultetu u Sarajevu. U svojoj dugoj nastavničkoj karijeri radio je na fakultetima u Beogradu, Prištini, Novom Sadu, Kosovskoj Mitrovici, Nikšiću i Banjoj Luci, te povremeno i drugim naučnim institucijama, u Vojnoistorijskom institutu i Institutu za istoriju radničkog pokreta u Beogradu. Bio je redovni član Akademije nauka i umetnosti Kosova. **Umro je u 83 godini, u Beogradu 12. decembra 2010. godine**, a sahranjen je u Novom Bečeju.

Baveći se historijom u širokom opsegu od srednjeg vijeka do novijeg vremena ostavio je značajnog traga u proučavanjima historije jugoistočne Evrope. Prepoznatljiv je po iscrpnim istraživanjima arhivske građe u brojnim arhivima Evrope i zaslužen je nosio epitet najvećeg arhivskog radnika. Učestvovao je na brojnim znanstvenim okupljanjima i na polju stručnog rada ostvario je bogat opus. Autor je 40 knjiga i više od 700 radova po čemu je jedan od najplodnijih srpskih historičara. U svojim radovima bavio se raznovrsnim temama iz historije jugoistočne Evrope, među kojima je značajno mjesto imala i prošlost Bosne i Hercegovine. Svoj dugogodišnji angažman na proučavanju historije Bosne i Hercegovine krunisao je ponovnim objavljivanjem svojih ranijih i novijih radova u višetomnom djelu *Iz starije prošlosti Bosne i Hercegovine*, (I-VI, Beograd 2003-2009).

ESAD KURTOVIĆ